

Monday, May 19, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

HEALTH MINISTER

Health Minister Pi Lalrinpuii'n Mizorama ruihhlo enkawlna hrang hrang chu Sawrkar hriatpuina Accreditation tih vek a ngai tawh dawn tih a sawi.

Vawiina a pisaa chanchinbumite a kawmnaah he thu hi sawiin Minister chuan sorkar in dan a neih The Mizoram Drug (Controlled Substance) Act, 2016 leh The Mizoram Drug Treatment cum Rehabilitation Center Accreditation Rules, 2019 hnuaiah Drugs De-Addiction Center/Rehabilitation Center te chuan Sorkarah Accreditation an tih vek a a ngai tawh dawn a ti a, dan hnuaiah chuan infrastructure, human resource, service, documentation leh adangteah zawm tur siam niin hetiang zawm lo chu Center din emaw kalpui phal a ni tawh dawn lo a ti a. Accreditation chu Centre-te tihtawp tumna ngawr ngawr a ni lo tih sawiin Centre ten rualkhai zawk leh ruihhlo ngaiten enkawlna an mamawh ang tak an dawn theihna tura awmze nei taka enkawlna kalpuina tur a ni a ti.

Minister sawi danin sorkar chuan Centre din a, an theih leh phak ang tawka enkawlna lo kalpuite inpekna pawh a hriatpui tel a ti a. Center ding sa chu awmze nei taka enkawlna an kalpui chhunzawm theih nan kawng hrang hrangin puihna pek a inhuam tih a sawi a. Sumfaia tanpuina bakah service pawimawh bik pek te pawh a tel dawn tih a sawi a ni.



ZMC

Ramchhunga Hospital tha bik tehna, NQAS Certification chu tunhnai khan Zoram Medical College & Hospital/State Referral Aizawl West District Hospital chuan a hmu thar a. Endik hna hi kumin March ni 21 leh ni 22 khan neih a ni.

ZMC hian NQAS ah za zela 92.89% hmu-in, LaQshya-ah (Maternity OT ah 98.26 leh Labour Room ah za zela 98.26%) leh MusQan (Paediatric deptt) ah za zela 92.80% a hmu a. India rama sawrkar damdawiin tha tehna hrang hrangah a rualin Certification 3 a hmu a ni.

Ramchhunga Hospital tha bik tehna, NQAS Certification hi Mizorama damdawiin hrang hrang ten anlo dawng tawh thin a, Damdawiin tha NQAS Certificate hmu tur hian hian District level, State level leh National Level atangin tehna hrang hrang paltlang tur niin Damdawiin tha tehna-ah hian tehfung hrang hrang 2000 chuang a awm a ni.



PHED

Thla tira tui nu avanga PHE department in tui an pump theih loh hnuah kar khat chuang harsatna awm loa tui pump a ni leh tawh.

Akashvani palaiin a zawhna chhangin PHE hotute chuan ruah tui tlain tun thla tira tlawng a tih nut avanga Aizawl khawpui chawmtu tui pump hleihtheih loh chuan ziaawm lam a pan tawh thu leh tun dinhmunah chuan harsatna awm loa tui an pump theih rih thu an sawi a. Ruah tui a tlak erawh chuan tui chu nu leh mai thei a nih thu an sawi.

PHE hotute chuan tlawng fintu lui te leivungin a hnawh nasa chu tuna an harsatna lian ber a nih thu an sawi a. Leivung hi paih belh miah lo pawh ni se kum 4 kum 5 chhung tui ti nu thei khawp leivungin tunah hian lui te hrang hrang a hnawh thu an sawi a. Kawngpui lai hin nasa takin leivung a hnawl thin thu an sawi bawh a ni.

Voicecast

Tun thla tir lam khan ruah tui tla avang leh heng ruah tui tla te hian nasa takin tlawngah kawr leh ui te hrang hranga leivung paih a hnawl luh avangin tui a nu nasa hle a, PHE dept chuan Aizawl khawpui tan tui a pump hleihtheih loh tih mipuite an lo hriattir tawh a. Tunah erawh chuan tui nu hi a ziaawm leh tawh a, pangngai takin kar khat chhung vel tui pump a ni leh tawh tih department hotute chuan min hrilh a. PHE Department chuan Aizawl mipuite lui hnar kawr leh luiteah te leivung paih tawh lo turin mipuite an ngen a. Hei bakah tui renchem tur te, ruahtui khawl tha tur tein mipuite an ngen bawh a ni.

PHE hotute chuan tunhnaia Lungleia tui harsatna chu sutkian a nih tawh thu sawiin Tluang taka tui pump theih a nih tawh bakah an tuikhuahah tui chim phak loh deuhah hna an thawk thei tih an sawi a. Hna kal zel chungin tui an pump reng thei tawh tih an sawi bawh a ni.



TRUCKERS

Mizoram Truck Owners Association leh Mizoram Truck Drivers Association chuan vawiin khan thuchhuah siamin Buichali leh Sairang inkar kawng chhe zual lai chu tunkar zirtawpni May ni 23 thlenga siamthat anih loh chuan bungraw phur truck an tlan ngam tawh dawnlo tih an sawi.

MTOA leh MTDA thuchhuah intawm tarlan danin Buichali leh Sairang inkar kawng chhe lutuk chungchang chu thuneitu hnenah vawi tam an thlen tawh an ti a, truck a tluk nual avangin a chhe zual lai hnawh tha turin an ngen tih sawiin May ni 23 thlenga hmalakna a awmlo anih chuan bungraw phur truck an tlan ngam tawh dawnlo tih sawiin eibar leh nitin mamawh a buai anih chuan mipuite hriatthiamna an ngen tih an sawi bawh.

Mizoram Truck Owners Association (MTOA) leh Mizoram Truck Drivers Association (MTDA) hian kumin kumtir lam khan Vairengte leh Sairang inkar National Highway kawng chhia avangin anlo tlan lo tawh bawh a ni.



TUIPUIRAL MHIP

Tuipuiral Block huam chhunga Mizo Hmeichhe Insuihkhawm Pawl, Vaphai branch chuan an khuaa chhungkaw pakhat, Pu Sanghnuna te chhungkua, damlohna leh chhiat tawhna avanga ram lam hna thawk chhunzawm thei lote Zikhlum hmunah vawiin khan fehin zikhlum tiak thahnem tak an phun sak.

Vaphai MHIP hnatlangah hian Member 34 lai an thawkchhuak a, Zikhlum tiak an phun sak Pu Sanghnuna hi Cancer vangin Shillong a damdawiin pakhatah enkawl mek a niin a nupui hi ZMC & H ah zaipui tawkin engmah thawk thei lovin a awm mek a, kumin February thla khan an fapa in a boral san bakah Ram hna thawk thei an awm loh vangin Vaphai Branch MHIP te hian Vaphai atanga Killometre 3 vela hla, Ser-sih rama an thlawhhmaah an chhungkua khaichhuak turin hnatlang hi an huaihawt ta a ni.

